

ČRNO, BOLNO KLUPKO

Črno bolno klupko
Žen i dice
Plaču, kukaju i nariču
Črez mirno prolično jutro.
Na nebi jasnen i svitlen
Ni mičega oblačića nij
Po drivih se lisje ne miče
Samor dvi črne tici kraču
Znad črvljenin krovićen
Kućice bele, miće.

A ženi i dica dumboko i se jače ciče.

Z tujine j glas prišal
Mina j čaću ubila.
Jedna navadna, brižna ženica, muža j zgubila.

Sestro ne plači, ne pomaganji, čoć... pomoći ni...
Mor lani j i Anici muža ubilo
Ma j kumpanija platila.
Za soldi ke j za muža dobila,
Anica j dici kravici kupila.